

ՍՏԵՓԱՆ ՈՍԿԱՆՅԱՆԻ ԿՅԱՆՔԻ ԵՎ ԳՈՐԾՈՒՆԵՈՒԹՅԱՆ
ՓԱՐԻԶՅԱՆ ՏԱՐԻՆԵՐԸ

Ս. Ա. ՇՏԻԿՅԱՆ

Ստեփան Ոսկանյանը (1825—1901 թթ.) մեր մշակույթի այն երախտավորներից է, որի կյանքը և մանավանդ հասարակական գործունեությունը լի են իրենց պարզաբանմանն սպասող «սպիտակ կետերով»։ Հենց այդպիսի մի «սպիտակ կետ» էլ հանդիսանում է նրա կյանքի 1846—1852 թթ. ժամանակահատվածը, երբ նա իր ծննդավայր Զմյուռնիայից մեկնեց Փարիզ, ուսումը շարունակելու համար, գործուն մասնակցություն ունեցավ 1848 թ. ֆրանսիական հեղափոխությանն ու 1849 թ. փարիզյան համաժողովրդական ցույցին, որի համար և բանտարկության դատապարտվեց։

Առաջին անգամ այս ամենի մասին գրեց Կարապետ Ութուջյանի «Մասիսը» 1859 թ., ըստ որում, իրողությունները ներկայացնելով որպես քաղաքական մեղադրանք Ոսկանյանի հասցեին։ «1848-ին,—գրում է «Մասիսը»,— հեղափոխությունը կը ծագի և անոր հետ՝ հավասարության (քոմյունիզմ) ու ընկերականության (սոցիալիզմ) աշխարհակործան սկզբունքները երևան կելլեն Գաղղիո մեջ։ Ս. Ոսկանյան այս վնասակար սկզբունքները քարոզող լրրագիրներ ու դիրքեր կարդալով կաշակերտի անոնց ու ջերմեռանդ ջատագով մը կըլլա նույն սկզբունքներուն։ ...1849-ին հունիսի մեջերը Փարիզի ստորին կարդի ժողովրդյան մեկ մասը ապստամբական շարժում մը ընելով, Ս. Ոսկանյան դրոշակակիր հանդիսացավ անոնց»¹։

Հետագա շրջանի Ոսկանյանի սակավաթիվ կենսագիրները, Ֆրանսիայի վերոհիշյալ դեպքերին նրա բերած մասնակցությունը հավանորեն անպատվաբեր դրվագ համարելով նրա կյանքում, գերադասել են կամ պարզապես չըխոսել այդ մասին, կամ էլ բավարարվել են մեկ-երկու հպանցիկ նախադասություն ասելով միայն։ Նույնիսկ Հրանտ Ասատուրը, Ոսկանյանի մասին ամենից ավելի լրջմիտ ու ամբողջական գիմաստվեր-կենսագրություն գրողը, 1846—1852 թթ. ամբողջ իրադարձությունների մասին նշում է միայն հետևյալը. «1852-ի պետական հարվածեն ետքը, երբ շատ մը ազատականներ Ֆրանսայեն վտարվեցան, Ստեփան Ոսկան ալ, որ մասնակցած էր 1848-ի և 1849-ի Փարիզի ռամկավարական ցույցերոն, ստիպվեցավ պահ մը թողուլ Փարիզը»²։ Մոտավորապես այսքանն էլ կրկնվել է հետագայում, ընդհուպ մինչև մեր օրերը։ Մեր հրապարակախոսի կյանքի այս ժամանակահատվածի քննությունը, այսպիսով, դեռ մնում էր չկատարված։ Ներկա հոդվածը մի փորձ է այդ բացը գեթ մասամբ վերացնելու։

¹ «Մասիս», 1859, № 387, հունիսի 25։

² Հր. Ասատուր, Դիմաստվերներ, Պոլիս, 1921, էջ 106։

1

Գոյութիւն ունենին հայազգի ծանոթ-բարեկամների մեկ-երկու հիմնական հանգրվաններ, որոնց ապավինելու հույսով Ոսկանյանը 1846 թ. աշնանը ոտք էր դրել Ֆրանսիայի մայրաքաղաքը՝ Դրանցից առաջինը Հարութիւն-Գարեգին Տատյանն էր, հետագայում հանրահայտ պետական գործիչ, Փարիզում թուրքական դեսպանատան առաջին քարտուղար Գարեգին Կալան: Վերջինս 1842 թ. հոկտեմբերին իր հոր՝ արքունի վառողապետ Հովհաննես Տատյանի հետ միասին այցելել էր Զմյուռնիա, եղել էր Մեսրոպյան վարժարանում և այդտեղ էլ ծանոթացել Ոսկանյանի հետ: Մի ծանոթութիւն, որը հետագայում վերածվել էր մտերմութեան: Հիշյալ՝ 1846 թ. կեսերին Հարութիւն-Գարեգին Տատյանը կատարելագործվելու նպատակով պատրաստվում էր ընդունվել Ալեքսանդր Լաբրուստի տնօրինութեան ներքո գրտնըվող «Սանտա Բարբառա» կամ կրճատ՝ «Սենտ Բարպ» անունը կրող դպրոցը, որտեղ իսկապես ընդունվեց 1847 թ. սկզբներին՝ Ի բնե ունենալով մարդամոտ ու պարզ բնավորութիւն, Տատյան-որդին կարողացել էր իր բնակարանը մի տեսակ ժողովատեղի դարձնել պանդուխտ հայորդիների համար, որոնք տարբեր առիթներով սիրում էին հավաքվել այնտեղ:

Ոսկանյանի հաջորդ հանգրվանը Փարիզում իր ազգական Նուպարյաններն էին: Իր ավագ որդուն՝ Նուպար Նուպարյանին հաճիրե ճանապարհելուց հետո Մկրտիչ Նուպարյանը մյուս որդու՝ Առաքելի հետ միասին 40-ական թթ. փոխադրվել էր Փարիզ, որտեղ կարողացել էր բավականին բարձր դիրք ու համարում ձեռք բերել: Նուպարյանների ամբողջ ընտանիքը ֆրանսախոս էր և, նախնական պայմանավորվածութեան համաձայն, Ոսկանյանը Փարիզում պետք է հայերենի դասեր տար Առաքել Նուպարյանին և, միաժամանակ, նրա օգնութեամբ կատարելագործեր իր ֆրանսերենը: Մի բան, որն, ի դեպ, երկուստեք կատարվեց ջանասիրաբար:

Կային մի քանի հեռու-մոտիկ ծանոթութիւններ էլ, որոնք ծայրահեղ անհրաժեշտութեան դեպքում կարող էին օգտակար լինել: Զմյուռնիայի ավագանին Ոսկանյանին էր տվել մի քանի նամակ-հանձնարարականներ, որոնցով նա Փարիզում պետք է ներկայանար իր համար նշանակութիւն ունեցող այս կամ այն անձնավորութեանը: Առաջին կարևոր ծանոթութիւնը տեղի ունեցավ Տատյանների բնակարանում, Ոսկանյանի՝ Փարիզ հասնելուց շուրջ երկու շաբաթ անց: Այստեղ հանդիպելով Ալեքսանդր Լաբրուստին, Ոսկանյանը նախ նրան տվեց Ղուկաս Պալղազարյանի նամակ-հանձնարարականը, և ապա հայտնեց իր փափագ-ծրագիրը՝ ուսանելու համար ընդունվել «Սենտ Բարպ» և այն ավարտելուց հետո շարունակել ուսումը Ֆրանսիայի բարձրագույն հաստատութեան՝ Համալսարանի բժշկական կամ ինժեներական ֆակուլտետում:

Իր երկարատև մանկավարժական գործունեութեան ընթացքում առաջին դեպքը չէր, որ Լաբրուստը դործ էր ունենում հայազգի երիտասարդների հետ, սակայն այն, ինչին ականատես ու ականջալուր եղավ նա հանձինս Ստեփան Ոսկանյանի, վեր էր ամեն պատկերացրածից: Գիտելիքների այն մեծ պաշարը, որը խոսակցութեան ընթացքում զրոսեորեց Ոսկանյանը, եվրոպական և հատկապես ֆրանսիական դրականութեանն ու արվեստներին նրա բաջտեղյակութիւնը, երևութիւնները դնահատելու, վերլուծելու ու ընդհանրացնելու նրա

ինքնուրույն, հաճախ համարձակ ունակությունը և վերջապես մաքուր, անսայթար, փարիզյան առողջանություն ունեցող նրա ֆրանսերենը հիացրին լուրրուստին: Ուստի վերջինս անհապաղ դործի անցավ, իր տնօրինության ներքո գտնվող վարժարանում նրան պահելու համար:

Ստեփան Ոսկանյանի նկատմամբ լաբրուստր ցուցաբերեց մոտավորապես այն վերաբերմունքը, ինչը նրանից մի որոշ ժամանակ առաջ մեր ականավոր դասականի՝ Խաչատուր Աբովյանի նկատմամբ ցուցաբերել էր Ֆրիդրիխ Պարրուտը: Վերջինիս նման, լաբրուստն էլ հանդեց այն եզրակացության, որ ամեն ինչ նորից-նոր սկսելու և հետևաբար իր սանին մյուսների նման առաջին ստորաբաժանում նստեցնելու կարիք չկա: Պարզապես անհրաժեշտ էր որոշ սիստեմի բերել նրա գիտելիքները, լրացնել թերին, ավելի խորացնել այն ամենը, ինչ մականբեռնային էր: Այս մտայնությունից ելնելով էլ՝ նա որոշ առարկաների դասախոսների «կցեց» Ոսկանյանին, որոնց նա պետք է ունկնդրեր պարտադրաբար, իսկ մյուս առարկաների հանդեպ վերաբերմունքը թողեց նրա հայեցողությանը: Միաժամանակ, սկսված դործն առավել ամբողջացնելու նպատակով, լաբրուստը Ոսկանյանին վերահսկիչի (մոնիտոր) պաշտոն տվեց «Սենտ-Բարպում», այսինքն՝ նա պարտավոր էր իր դասերից դուրս ֆրանսերեն պարապել վարժարանի ոչ ֆրանսիացի աշակերտների հետ (ի տարբերություն Ֆրանսիայի մյուս դպրոցների, որտեղ սովորելու համար կարող էին ընդունվել միայն ֆրանսիացիները, «Սենտ-Բարսը» բազմազգյա էր) և հետևել նրանց վարք ու բարքին: «Սենտ-Բարպ» վարժարանին մեջ ոչ բնակեր և ոչ աշակերտներու հետ խառնվեր ենք բնավ,— այս առիթով գրում էր Ոսկանյանը,— կը հաստատենք թե երբեք «Սենտ-Բարպի» մեջ չմտանք իբրև աշակերտ և երբեք պարոն լաբրուստը այդպիսի դիտավորություն մը չունեցավ մեզի համար: Պարոն լաբրուստ օր մը, պ[արոն] Գ[արեգին] Տատյանին սենյակը տեսնելով զմեզ ու մեր լեզվագիտությունը և ուսումնասիրությունը նշմարելով, հաճեցավ թեթև պաշտոն մը տալ մեզ վարժատունեն դուրս: Արդարև այս մեծ բարերարություն մ' էր և ամեն դյուրություն կուտար ուսումներու ղեգղիլ Սորբոնի, Քոլեժ դը Ֆրանսի, Քոնսերվատորար դեզ Ար է Մեթիեյի մեջ»³: Հիշատակված ֆրանսիական երեք ուսումնական հաստատությունների՝ Սորբոնի, Կոլեժ դը Ֆրանսի և Արվեստների ու գիտությունների կոնսերվատորիայի (Ոսկանյանն օգտագործել է այս վերջինի ֆրանսիական անվանումը Conservatoire des Arts et Metiers) մասին դեռ խոսք կլինի: Մեզ համար այստեղ կարևորը այն գործունեության բացահայտումն ու ճշգրտումն է, որը Ալ. լաբրուստի անմիջական հսկողության ներքո ծավալել էր Ոսկանյանը «Սենտ-Բարպում»:

Կոնկրետ ուր առարկաներն էին, որոնք պարտադիր էին նորընծա վերահսկիչի համար և հետևաբար որ դասերն էր, որոնց նա անհրաժեշտաբար պետք է մասնակցեր, ցավոք հայտնի չէ: Ելնելով այն փաստից, որ «Սենտ-Բարպի» մասին հրատարակած իր մի հոդվածում⁴ Ոսկանյանը առաջին հերթին հիշատակում է ճշգրիտ առարկաներն ու նրանց դասավանդությունը, դրվատանքով է արտահայտվում «սկզբունք ուսողության» (իմա՝ մաթեմատիկա), բնական գիտության, «տարրազննության» (իմա՝ քիմիա) առարկաների

³ «Արևմուտք», 1859, № 17, էջ 150:

⁴ «Արշալույս Արարատյան», 1847, № 298:

մասին, ոչ մի խոսք չասելով վարժարանի մյուս դասախոսների վերաբերյալ, շտապում է սակայն ծանուցանել, որ այնտեղ է ավանդում «Սթուրմ մաթեմատիսին», որն, ի դեպ, շարքային մեծություն էր կիրառական մաթեմատիկայի բնագավառում,—այս բոլորից պետք է ենթադրել, որ Ոսկանյանի համար պարտադիր էր հիշյալ առարկաների դասավանդությունը։ Այս ենթադրությանը ուժ է տալիս նաև այն հանգամանքը, որ Զմյուռնիայի Մեսրոպյան վարժարանում, որի շրջանավարտն էր նա, այդ բնույթին ունեցող առարկաներին երկրորդական-երրորդական տեղ էր հատկացված և, բնականաբար, Ոսկանյանը պետք է աշխատեր լրացնել հատկապես այդ պակասը, բժշկական, առավել ևս ինժեներական ֆակուլտետ ընդունվել կարողանալու համար։

Հակումը դեպի ճշգրիտ գիտությունները և բժշկի կամ ինժեների մասնագիտություն ձևաբերելու Ոսկանյանի սկզբնական նպատակադրվածությունը ուներ իր սոցիալական խորագնա պատճառները։ Տարիների փորձը արդեն սովորեցրել էր հայերին, որ բնապետական այնպիսի մի երկրում, ինչպիսին օսմանյան կայսրությունն էր, որտեղ օրենքները միայն նրա համար էին, որպեսզի ավելի հիմնավոր դարձնեին ոչ մուսուլման ազգերի նկատմամբ ամեն մի կողոպուտ ու վայրագություն, գոյատևելու համար քիչ թե շատ կայուն միջոցներ կարող էին ապահովել միայն ճշգրիտ մասնագիտությունները։ Այսպիսին էր անագորույն պայմանների արդյունք հանդիսացող դժան օրինաչափությունը, և Ոսկանյանն էլ, հասկանալի է, չէր աշխատելու բացառություն կազմել։

Շատ ծանրաբեռնվածություն և ֆիզիկական ու մտավոր կարողությունների մեծ լարում չէր պահանջում «Սենտ-Բարպի» հալազգի վերահսկիչի իր պարտականությունների կատարումը։ Եվ բնականորեն, Ոսկանյանը անհապաղ պետք է ձեռնամուխ լիներ իր ուսման թերին ու բացթողածը լրացնելու Փարիզի մյուս ուսումնական հաստատություններում։ Հենց այսպիսի մի կրթական օջախ էր հանդիսանում վերևում հիշատակված Արվեստների ու գիտությունների կոնսերվատորիան⁵, որտեղ ուսանելու մասին, ինչպես տեսանք, վկայում է հենց ինքը։ XVIII դարի առաջին կեսին հիմնադրված և սկզբնական շրջանում արդյունաբերական-մեքենագիտական ցուցահանդես-թանգարան հանդիսացող այս հաստատությունը XIX դարի ըսկզբներից սկսեց մեծ անուն ու հեղինակություն ձևաբերել այն պատճառով, որ 1819 թ. սկսած, իրենց մոտ եղած ցուցանմուշների հենքի վրա (այնին շուրջ 11 հազար ցուցանմուշ) այնտեղ սկսվել էին դիտա-հանրամատչելի բնույթի հրապարակային դասախոսություններ։ Դա հենց այն էր, ինչ անհրաժեշտ էր Ոսկանյանին, որովհետև նախ՝ դասախոսություններն անվրձար էին և երկրորդ՝ դասավանդվում էին այն առարկաները (նկարագրական և արդյունաբերական երկրաչափություն, կիրառական մեխանիկա, քաղաքացիական ճարտարապետություն, ֆիզիկա, մետաղագիտություն, էլեկտրատեխնիկա և այլն), որոնց բնագավառում նրա գիտելիքները առանձնապես թերի էին։ Եվ եթե ավելացնենք, որ Կոնսերվատորիան հիմնականում զոր-

⁵ Այստեղ և հետագայում, ուսումնական այդ հաստատության անունը ճիշտ տալու նպատակով պահպանում ենք Կոնսերվատորիա բառը, դիտակցելով իհարկե, որ այն շունի այսօրվա իմաստն ու նշանակությունը։

ծում էր աշնան-ձմեռային ամիսներին, իսկ Ոսկանյանը, ասացինք արդեն, Փարիզ էր եկել 1846 թ. աշնանը, ապա դժվար չէ դալ այն եզրակացության, որ առաջին հերթին այս հաստատությունն էր, որտեղ հաճախելու էր նա:

Եթե Կոնսերվատորիայում լրացվելու էին Ոսկանյանի գիտելիքները՝ չգրիտ գիտությունների բնագավառում, ապա Ֆրանսիայի մյուս ականավոր կրթական հաստատությունը՝ Կոլեժ դը Ֆրանսին, որտեղ հաճախում էր նա նախորդի հետ հավանորեն միաժամանակ, կամ գուցե փոքր-ինչ հետո, արդեն բուրրովին այլ դեր ու խնդիրներ էին վերասլացված: Իր հիմնադրման սկզբից իսկ (1530 թ.) սույն հաստատությունը հումանիտար-էսթետիկական-փիլիսոփայական բնույթ ուներ և շնայած հետագայում (1800-ական թթ.) այնտեղ բնական գիտությունների ամբիոն բացվեց, բայց դրանից Կոլեժ դը Ֆրանսի ընդհանուր ուղղությունը չփոխվեց: Եվ եթե չմոռանանք, որ Ֆրանսիայի բոլոր ուսումնական հաստատությունների համեմատությամբ Կոլեժ դը Ֆրանսը աչքի էր ընկնում իր ամենալայն դեմոկրատական բնույթով (բոլոր դասախոսություններն անվճար էին, յուրաքանչյուրոք առանց սեռի, տարիքի, կրթության և ազգության խտրության կարող էր հաճախել ցանկացած դասախոսությանը, ուսանողների համար գոյություն չունեին ոչ մի տիպի քննություններ ու ստուգարքներ և այլն), ապա ըմբռնելի կդառնա, թե ինչու Ոսկանյանը չպետք է աչքաթող աներ ուսումնական այս հիմնարկը:

Ի՞նչ դասախոսությունների էր հաճախում Ոսկանյանը Կոլեժ դը Ֆրանսում: Այս հարցին քիչ թե շատ բավարար պատասխան տալու օգնում է հենց ինքը: Վաղուց ասված-կրկնված է, որ Փարիզում ուսանելու տարիներին նա լսել էր Միշլեի, Կինյեի, Ժյուլ Միմոնի և Կուլենի դասախոսությունները, որոնցից մի քանիսի հետ նույնիսկ անձնական մտերմություն է ունեցել⁶: Արդ՝ Ֆրանսիայի գիտական պարծանքը հանդիսացող վերոհիշյալ դասախոսներից առաջին երկուսը հենց դասախոսում էին Կոլեժ դը Ֆրանսում: Ժյուլ Միշլեն, որն այդտեղ էր հրավիրվել դեռ 1838 թ. ընդհանուր պատմություն ավանդելու համար և էդգար Կինյեն, որը Կոլեժ դը Ֆրանսում էր 1840-ից և ավանդում էր փիլիսոփայության պատմություն, օգնում են մեզ բավական բան պարզելու: Իմանում ենք նախ, որ Ոսկանյանը Կոլեժ դը Ֆրանս էր հաճախում իրոք տեսական-փիլիսոփայական բնույթի պատրաստություն ու զարգացում ստանալու համար: Իրազեկ ենք դառնում ապա, որ նրա միտքը ձևավորող Ժյուլ Միշլեն ու էդգար Կինյեն էլ հենց, պետք է նրան ներարկած լինեին հավասարության, ազատության, ազատությունը կոչով պաշտպանելու, միապետականության հանդեպ ատելության և նրան տապալելու համար պատրաստակամ լինելու այն գաղափարաբանությունը, որի ջատագովն ու մունետիկն էր դառնալու հետագայում: Իդուր չէր, որ թե՛ Միշլեի, և թե՛ Կինյեի դասախոսությունները մշտապես աչքի էին ընկնում իրենց ազատախոս բնույթով և ի վերջո, նրանց երկուսին էլ այդ պատճառաբանությամբ հեռացրեցին Կոլեժ դը Ֆրանսից: Իմանում ենք վերջապես, որ Ոսկանյանի գաղափարական զարգացումն ու հասունացումը սկսվեց Կոլեժ դը Ֆրանսում և հենց այս հաստա-

6 Բանասեր Խ. Գարիկյանը Ոսկանյանին նվիրված իր հոդվածի մեջ (տե՛ս «Ամենուն տարեգիրքը», Բեյրութ, 1955, էջ 126) նշում է, որ Կոլեժ դը Ֆրանսում Ոսկանյանը հետևել է նաև «Լեհ բերթող Միցրեկի դասերուն»: Փաստն ընդհանրապես շատ հավանական է, բայց այդ պնդումը հավաստող որևէ այլ տվյալ մենք չկարողացանք գտնել, իսկ Գարիկյանը ոչ մի աղբյուր չի հիշատակել:

տուվյունն էր, որ լիցքավորեց ու քաղաքական կողմնորոշում տվեց նրան ֆրանսիական հեղափոխության հանդեպ: Հանրահայտ է, որ Ֆրանսիայի կրթական այս հաստատությունը մշտապես հռչակված է եղել իր հակաբռնապետական տրամադրություններով: Իսկ քանակական այս կուտակումների որակական փոփոխությունն այն եղավ, որ Ոսկանյան-ուսուցչից, Ոսկանյան-ուսանողից աստիճանաբար կազմակերպվեց Ոսկանյան-քաղաքական գործիչը:

Ոսկանյանի հասարակական-քաղաքական գործունեության նախակարապետները նկատվում են դեռ 1847 թ., դուցե և փոքր-ինչ ուշ, երբ նա սկսում է թղթակցել հրապարակախոս Արման Կարելի և պատմաբան Լուի Տիերի հիմնադրած «Նասիոնալ» օրաթերթին: «Նասիոնալը» դոյուվյուն ունեցավ մինչև 1851 թ. վերջը, և ուրեմն, Ոսկանյանը այդ թերթին թղթակցում էր ամբողջ շորս տարի: Ինչ էր գրում նա՝ չգիտենք. այդ հոդվածներից առայժմ ոչ մեկը չունենք ձեռքի տակ: Ակնարկներ կան, որ այդ ժամանակներից իսկ նա աշխատակցում էր Լեդրյու Ռուենի հիմնադրած «Լեֆորմ» պարբերականին⁸: Վերջին փաստը, որքան էլ ճշգրտման կարիք ունենա, հեռու չէ հավանականությունից, որովհետև երկու պարբերականներն էլ գրեթե միանրման քաղաքական գիծ ունեին և ինչպես 1848 թ. ֆրանսիական բոլոր մեծ ու փոքր իրադարձությունների, այնպես էլ դրանց նախորդած դեպքերի հանդեպ գրեթե նույն մոտեցումն էին մշակել: Այդ քաղաքական գիծը կարելի է բնութագրել մոտավորապես հետևյալ կերպ. տապալել Լուի-Ֆիլիպի՝ ֆրանսիացիների համար ատելի դարձած միապետությունը և դեմոկրատական, համընդհանուր ընտրությունների հիման վրա ստեղծել հանրապետություն:

Քաղաքական այսպիսի կողմնորոշում ունեցող «Նասիոնալում» (դուցե և «Լեֆորմում») էր ահա, որ սկսել էր հանդես գալ Ոսկանյանը և այս հանգամանքը, հասկանալի է, անիմաստ պատահականություն լինել չէր կարող: Դա նշանակում էր, որ երիտասարդ հրապարակախոսը ոչ միայն պետք է համակրեր այդ պարբերականների որդեգրած ծրագիր-քաղաքականությունը, այլև անհրաժեշտության դեպքում՝ հանդես գար այդ քաղաքականությունը պաշտպանողի դերում: Եվ հարաճուն կերպով զարգացող իրադարձությունների հետագա ընթացքը եկավ հենց այդ ապացուցելու:

Իրադարձությունները ծայր առան 1847 թ. վերջերից, երբ Լուի-Ֆիլիպի թագավորը կամեցավ ըստ իր հայեցողության փոփոխություններ մտցնել Ֆրանսիայի ընտրական օրենսդրության մեջ այն հաշվով, որ դեպուտատների թեկնածությունների առաջադրման, նրանց ընտրության և նման բնույթի այլ հարցերի վերաբերյալ վճռական ձայնը, ի վերջո, վերապահվի իրեն: Հարցն առանձնապես սրվեց այն բանից հետո, երբ ի պատասխան Լամար-թիևի՝ այդ ամենի վերաբերյալ արված հարցապնդմանը, Լուի-Ֆիլիպը տվեց «անում եմ ինչ նպատակահարմար եմ գտնում» անհեռատես պատասխանը: Ամեն ինչ լրացավ 1848 թ. փետրվարի սկզբներին, երբ «Նասիոնալը» տապ-

⁷ Տե՛ս «История XIX века (под ред. Лавинса и Рамбо)», М., 1938, т. 3, էջ 407—413; «История Франции в 3-х томах», т. 2, М., 1973, стр. 550—663 (гл. «Посвящение»).

⁸ Ոսկանյանին նվիրված մի հոդվածում «Բյուզանդիոնը» (1901 թ. № 1346) տեղեկացրեց, որ այս ժամանակաշրջանում նա թղթակցել է նաև «Կոնստիտուիոնիլ» լրագրին: «Կոնստիտուիոնիլ» որե՛ք համար անկարելի եղավ գտնել մեր և Միության զրապահոցներում, իսկ այս փաստը վավերացնող ուրիշ վկայություն չկարողացանք գտնել:

նապակից հաղորդում հրապարակեց այն մասին, որ կառավարությունը հրաման է տվել զորքերի և Ազգային գվարդիայի ընդհանուր հրամանատար Խուլմաս-Ռոբեր Բյուժոյին բանակը մարտական վիճակի մեջ դնելու և այս կապակցությամբ ռազմական նախնական պատրաստություններն սկսելու մասին: Փարիզի գործավոր դասակարգը արդեն լցված էր թագավորի և նրա վարած ձախուժում քաղաքականության դեմ: Առիթը առավել քան հարմար էր վերաբերմունք դրսևորելու համար և սկսվեց այն մեծ իրողությունը, որը պետք է կազմեր Ֆրանսիայի պատմության ամենափայլուն էջերից մեկը⁹:

Ժողովրդական լայն զանգվածների պայքարը ղեկավարելու, այդ պայքարին ուղղություն հաղորդելու գործում իրենց որոշակի դերն ունեին «նասիոնալ» և «Ռեֆորմ» թերթերը: Երկուսի համատեղ ջանքերով արդեն ռուսեղծվել էր իրենց «Կլուբը»՝ այժմյան տերմինով ասած՝ շտաբ-խմբադրությունը, որտեղ մշտապես հավաքվում էին Դյուպոն դը Լ'էրը, Արագոն, Լամարթինը, Լեդրյու-Ռոլենը, Կրեմյոն և էլի ուրիշներ: Ինչդեռ ուներ Ոսկանյանն այստեղ՝ ցավոք չգիտենք: Հայտնի է միայն, որ նա անձամբ ծանոթ էր Կլուբի անդամներից՝ Լամարթինի և Արագոյի հետ, ըստ որում ծանոթությունը վերջինիս հետ հասնում էր մտերիմ բարեկամության:

Իր անելիքներն ավելի լավ պարզաբանելու նպատակով Կլուբը աշխատանքի հետեյալ բաժանումն էր սահմանել: Նրա անդամներից մի քանիսը (օրինակ՝ Լամարթինը, Լեդրյու-Ռոլենը, Գարնիե-Պաժեսը) հանդես էին գալիս Ազգային խորհրդում պալատի զանազան նիստերում, որտեղ առաջ էին քաշում գերազանցապես այն հարցերը, որոնք իրենց էջերում բարձրացնում էին «Նասիոնալն» ու «Ռեֆորմը»: Կլուբի անդամների մյուս մասը նույնն անում էր անմիջապես ժողովրդի մոտ՝ հրապարակներում, այգիներում, փողոցների խաչմերուկներում: Առաջինները նույնիսկ պաշտոնապես ու պաշտոնական գրականության մեջ կոչվում էին «պալատական հրապարակախոսներ» կամ ֆրանսերեն՝ «օբատոր դը պալե», իսկ երկրորդները ստացել էին «խաչմերուկային հրապարակախոս», ֆրանսերեն՝ «օրատոր դը կարֆուր» անվանումը: Արդ՝ փաստերի քննությունը մեզ հանգեցնում է խիստ կարևոր այն եզրակացության, որ Ոսկանյանին վստահված էին ժողովրդական մասնաճյուղին տեղի ունեցող իրադարձությունները բացատրելու ու նրանց պայքարի կոչելու, այսինքն՝ «օրատոր դը կարֆուրի» պարտականությունները:

Ոսկանյանի այս «պաշտոնի» մասին առաջին անգամ գրեց Պոլսի «Մասիս» օրաթերթը 1859 թ., երբ ի թիվս նրա կատարած «հայի անունը խայտառակող» արարքների, նշվեց վերևում ասվածը հավաստող հետևյալը. «Ստեփան Ոսկանյան այնուհետև բոլորովին ինքնագլուխ ու ամեն նկատմունքն ազատ մնալով, փողոցներու ատենաբան (օրաթեր դը քարֆուր) մը եղավ, զոեհիկ ընկերականաց ժողովականերու (քլուպ) անդամ եղավ: փողոցներուն մեջ ընկերականություն ու տերության դեմ ապստամբություն քարոզել սկսավ»¹⁰: Եվ որ մեզ համար ոչ սլակաս կարևոր է, իր «Քսանչորս ստությունը» պատասխանով հանդես գալով «Մասիսում» տպագրված հիշյալ հոդվածի դեմ, կետ առ կետ հերքելով իր վրա բարդվող պանազան մեծ ու

⁹ См. К. Маркс, «Классовая борьба во Франции с 1848 по 1850 г.». Маркс и Энгельс, Соч., т. 7, М., 1956, стр. 8—32.

¹⁰ «Մասիս», 1859, № 387:

փոքր «ստոլթյունք»-ները, Ոսկանյանը, սակայն, ամենևին չհերքեց այս մեղադրանքը, շհերքեց 1848 թ. փետրվարի օրերին իր՝ «փողոցներու ատենաբան» և հետևաբար՝ «տերության դեմ ապստամբություն քարոզող» լինելը։

Եվ այսպես, Փարիզում, 1848 թ. փետրվարյան օրերին, քսաներեքամյա հրապարակախոսը պայքարի ու կռվի էր կոչում ժողովրդին։ Նա բացատրում ու պարզաբանում էր շատերին, որ դառնալով Ֆրանսիայի թագավոր (1830 թ. օգոստոսի 9), Լուի-Ֆիլիպը, հնարավոր է, թագավորական դեմոկրատիզմի սահմաններում որոշ բարեփոխումներ կատարեց երկրում, բայց հետագայում և մանավանդ 1840-ական թթ. սկսած, նա աստիճանաբար վերածվեց իսկական բռնապետի, անհոգի ու ժանտ մի տիրակալի, որի իմացած միակ ձևը պործավոր դասակարգի հետ խոսելու համար բռնությունն է ու զենքը և հետևաբար պետք է անհապաղ տապալել նրան։ Բացատրում էր ու պարզաբանում, որ Ֆրանսիան իր հասարակական պատմության ընթացքում ունեցել է բոլոր տեսակետներից ավելի բանական մի ժամանակաշրջան՝ 1789 թ., երբ, ի պատասխան Լյուդովիկոս XIV թագավորի նմանատիպ բռնակալական նկրտումների, ապստամբած ժողովուրդը զահագուրկ արեց նրան, ստեղծելով իր ժողովրդա-դեմոկրատական վարչակարգը, իսկ Բաստիլի գրավման ու կործանման ակտով (1789 թ. հուլիսի 14) ամբողջ աշխարհին ցույց տվեց, թե ինչ կարող է անել Ֆրանսիացին, երբ ճնշում են նրա ազատությունը և որ այժմ, այսինքն 1848 թ. էլ պետք է անել այն, ինչ ալվել է 1789 թ.։ Քսաներեքամյա հայ հրապարակախոսը բացատրում էր ու պարզաբանում, որ ոչ մի ժամանակ ազատություն խորհրդանշող Ֆրանսիան և ազատաբաղձ Ֆրանսիացիները չեն եղել այնքան ցածր, այնքան աննախանձելի վիճակում, ինչպես այժմ, այսինքն 1848 թ. և դրա համար մեղավոր են Լուի-Ֆիլիպ թագավորն ու նրա կարճամիտ մինիստրները, որոնք պետության ու ժողովրդի շահերը մի կողմ թողած, զբաղված են շուայլ բանկետներով, բաժակաճառ հիշեցնող ուղերձներ հղելով, թագավորական ցեղի մեծ ու փոքր զարմուհիների համար փեսացուներ ընտրելով։

Այսպիսին էր, քիչ ավել կամ քիչ պակաս, Ոսկանյան-հրապարակախոսի կամ Ֆրանսերեն տերմինով ասած՝ Ոսկանյան-«օրատոր դը կարֆուրի» գործունեության բնութագիրը Փարիզում, 1848 թ. փետրվարյան նշանավոր օրերին. մի գործունեություն, որի մասին ներքին հպարտությամբ ազդարարում է հենց ինքը. «Փետրվարի ազատության առաջին որոտումը,— գրում է նա,— մեր վրայեն արևելյան գերության մշուշը փարատեց, մեր սիրտը բորբոքեց հրաբուխ սաստկությամբ, անհուն աշխույժ մը տվավ մեզ և գրեթե ակամա ասպարիզ նետեց»։ Կամ. «...ապստամբ բառը մեր երեսին տվին (հայազգի իր «բարեկամները»—Ս. Շ.) իբրև կեղտ ու ամոթ և կարծեցին, որ պիտի «խայտառակվինք»։ Զեվզեկները մեզ գովություն տվին։ Այո՛, ապրստամբ ենք, այսինքն 89 (իմա. 1789—Ս. Շ.) վեհ թվականը կը սիրենք հոգով և մարմնով»¹¹։

Այսպիսի վկայակոչումներ կարելի է էլի բերել, ցույց տալու համար, որ «նասիոնալ» թերթի Կլուբը իրոք կարողացել էր գտնել հատկապես այդ գործի համար կոչված ու իր անելիքները լավ իմացող թեկնածուի, մեկին, որը

¹¹ «Արևմուտք», 1859, № 17, էջ 132, 159։

կարող էր թերթում արժարժվող գաղափարները հասցնել ժողովրդական զանգվածներին:

Իսկ պատմական դեպքերը զարգանում էին մեծ արագությամբ...

Իր սեփական ուժերի վրա չափից ավելի վստահ լինելն էր պատճառը, թե՛ այդ ուժերի ունակ վիճակի նկատմամբ անտեղյակությունը, որ ընդհանուր զորահրամանատար Բյուժոն, զայրացած ու վրդովված մայրաքաղաքում ծայր առած «անկարգություններից», 1848 թ. փետրվարի 22-ին հրամայեց կրակել Սլիսեյան դաշտում հավաքված շուրջ քսան հազար ցուցարարների վրա: Կրակոցների փոխարեն տեղի ունեցավ Ազդային գվարդիայի զինվորների ու ցուցարարների մասսայական եղբայրացում, որն ավարտվեց նրանով, որ զինվորներն իրենց զենքը տվեցին ապստամբներին. ժողովրդական զանգվածների խռովքը կասեցնելն այլևս հնարավոր չէր, իսկ թագավորական Տյուիլրի պալատը պաշտպանող զինվորների անկազմակերպ դիմադրությունը սոսկ յուղ լցրեց կրակի վրա: «Մարսելյոզը» շուրթերին և զենքը ձեռքին ապստամբները տրորեցին իրենց ցույց տրվող ամեն տիպի դիմադրություն և երկու օր անց, փետրվարի 24-ին, հաղթական բացականչություններով խուժեցին Տյուիլրի պալատը, ջարդելով ու պատուհաններից դուրս նետելով այն ամենը, ինչ հիշեցնում էր ատելի թագավորին, նրա կառավարությունը, նրա մերձավորներին¹²:

Ամբողջ այս իրադարձությունների առաջին շարքերում էր և ապստամբների հետ միասին արքայական պալատը մտնողների մեջ էր նաև Ստեփան Ոսկանյանը. այս կապակցությամբ նրա հպարտ հայտարարությունը որևէ վերապահության տեղիք չի տալիս. «Այո,— գրում էր նա,— Լուի-Ֆիլիպին դեմ ապստամբողներու հետ էինք, այո, ըրինք ազատության համար ինչ որ ամեն մարդու պարտքն էր ընել և զեն ի ձեռին Թյուիլրի մտնելու պատիվը ունեցանք»¹³:

Փետրվարի 24-ը եղավ Լուի-Ֆիլիպի անփառունակ թագավորության վերջին օրը: Նույն օրը «Նասիոնալի» Կլուբը կազմեց դեպուտատության թեկնածուների իր ցուցակը (Դյուլպոն դը լ'էր, Արագո, Լամարթին, Լեդրյու-Ռոլեն, Կրեմյո, Մարի, Գարնիե-Պաթես), «Ռեֆորմը» նույնությամբ վավերացրեց այդ կազմը, հավելելով միայն Ֆլոկոնի («Ռեֆորմի» պատասխանատու քարտուղարը) և մեքենագործ-բանվոր Ալբերի անունները և մի օր անց Ֆրանսիան հայտարարվեց հանրապետություն, իսկ հիշյալ անձինք՝ նրա մինիստրները:

2

Ֆրանսիայի հայազգի հրապարակախոսին ու ապստամբության շարժման մասնակցին նորից հանդիպում ենք մոտ տարի ու կես հետո, 1849 թ. հունիսի 13-ին, դարձյալ ցույցի և դարձյալ ցուցարարներին կազմակերպելու առիթով: Այս անգամ ցույցը կազմակերպել էին ուսանողները, ի նշան բողո-

¹² Տե՛ս «История XIX века (под ред. Лависса и Рамбо)», М., 1938, т. 5, էջ 6—41. Е. Тарле, Жерминаль и прерналь (III изд.), М., 1957, стр. 300—350

¹³ «Արևմուտք», 1859, № 17, էջ 132: Ավելորդ չենք համարում նշել, որ «Տարազը», օգտվելով մեզ անհայտ աղբյուրից, ժամանակին հրապարակել է հետևյալ տեղեկությունը. «Ոսկանյանը... 1848 թ. ֆրանսիական հեղափոխության մեջ մասնակցելիս ծանր վերք էր ստացել» («Տարազ», 1901, № 13):

քի այն ավանտյուրիստական պատերազմի, որը վարում էր կառավարությունը ընդդեմ Իտալիայի և որ ամենազավեշտականն է, պատերազմը մղվում էր «Իտալիան փրկելու», «Իտալիան ազատելու» պատրվակով: Յուզյն, այսպիսով, քաղաքական բնույթ ունեւ և անհամեմատ ավելի համեստ նպատակներ էր հետապնդում: Դա, սակայն, չխանգարեց Փարիզի Ազգային դվարդիայի նորընտիր հրամանատար, գեներալ Նիկոլայ-Թեոդոլ Շանդարնիին, որն այդ պաշտոնին էր նշանակվել 1848 թ. դեկտեմբերին և որը առանձնապես ջանում էր աչքի ընկնել կառավարության առջև, անողոք դաժանությամբ ցրելու ցույցը, հրադենից բացի կիրառելով բոլոր մյուս միջոցները (խուզակոթ, մտրակ, ծեծ, ձիերի ոտքերի տակ տրորել), որոնք գտնվում էին իր իրավասության ներքո: Մեզ համար կարևոր է այն փաստը, որ Ոսկանյանի դերը այստեղ էլ երկրորդական չէր: Նա բացում էր ցուցարարների առաջին շարքերում: «Ուսանողը միազունդը ժողովելով և դրոշը առնելով սկսան պուլվարներու վրայն դեպի Ազգային ժողովը ուղղվիլ,— դրում էր նա:— Կրոնական կողմը այս բողոքի շարժումը զրպարտելով և Ազգային դորքը անէն խաբվելով, սկսավ ուսանողներու դեմ դնիլ և պզտի ընդդիմութենն մը ետև ցրվեց զանոնք: Աղերսագիր տանող բազմության դրոշակակիրը մեր բարեկամներն մեկն էր և որովհետև իր բով կը գտնվեինք, դրոշակը մեր ձեռքը անցավ շփոթին մեջ և կարող եղանք զայն պաշտպանելու իբրև ուսանող և ոչ իբրև մարտիկ ապստամբ»¹⁴:

Ուրեմն. 1848 թ. փետրվարի 22—24-ի իրադարձություններին Ոսկանյանը մասնակցում էր՝ ձեռքին զենք ունենալով և Տյուիլրիի արքայական պալատը մտնելով: 1849 թ. հունիսի 13-ի ուսանողական-քաղաքական ցույցին Ոսկանյանը մասնակցում էր՝ ձեռքին դրոշակ ունենալով և «շփոթին մեջ զայն պաշտպանելով»: Փաստերն այնքան պերճախոս են և այնպիսի զեղեցիկ բնութագրական դժեր են ավելացնում Ոսկանյանի կյանքի այս ժամանակահատվածի վրա, որ ավելին դժվար կլինի ենթադրել անդամ:

Իհարկե, ամեն ինչ այսքանով շավարտվեց: Գեներալ Շանդարնիեն, իսպապես, հիմնավոր հետևողականությամբ էր ձեռնամուխ եղել իրեն վստահված դործը մինչև վերջ հասցնելուն, ուստի ցույցը ցրելուց հետո հրամայեց ձերբակալել ինչպես կազմակերպիչներին, այնպես էլ դործուն մասնակիցներին: Եվ մի քանի օր անց, Շանդարնիեի դործակալները, ի թիվս այլոց, ձերբակալեցին նաև Ոսկանյանին: Ինչ-որ տեղ, Իհարկե, այդ ձերբակալությունը շատ էլ իմաստալից չէր, որովհետև ֆրանսիական կառավարությունը դեռ մի քանի տարի առաջ օրենք էր ընդունել, ըստ որի օտարականները, եթե նրանք մասնակցություն են բերում հակապետական բնույթ ունեցող թեկուզև ամենախոշոր իրադարձություններին (բացառությամբ դիտավորյալ սպանությունը, զինված կողոպուտը) մեղավոր չէին ճանաչվում և ազատ էին արձակվում: Ոսկանյանն օտարական էր, և, բնականաբար, այս օրենքը ուղղակիորեն առնչվում էր նրա հետ: Չնայած դրան, վերջինս բանտում մնաց շուրջ երկու ամիս, ավելի կոնկրետ՝ 54 օր...

1849 թ. աշնանը Ոսկանյանն ազատվեց բանտից և պատրաստվեց անցնելու իր նախկին դործերին: Բայց ավա՞ղ, շատ բան էր փոխվել...

¹⁴ «Արևմուտք», 1859, № 17, էջ 132:

«Փոխվածներին» առաջինը հայր և որդի Տատյաններն էին: Հեռատես էր և խորամանկ Տատյան-հայրիկը: Նա իսկույն կռահեց, որ իր որդուն՝ Հարություն-Գարեգին Տատյանի մտերմությունը այնպիսի «վտանգավոր» մեկի հետ, ինչպիսին էր Ոսկանյանը, ոչ միայն լավ բան չէր կարող խոստանալ, այլև կարող էր շարիքների դուռ բանալ և առնդմիշտ խորտակել որդու ապագան: Եվ նա անհապաղ որդուն ուղարկեց Պոլիս, հարազատների մոտ, մանավանդ որ այդ անելու հրաշալի փաստարկ կար. որդին արդեն ավարտել էր «Սենտ-Բարպե»: Ի՞նչ սովորեց որդին «Սենտ-Բարպում», քանի որ նա այնտեղ մեկ տարուց էլ պակաս մնաց (Հարություն-Գարեգին Տատյանը ավարտեց 1848 թ. հունվարի 31-ին), իսկապե՞ս ավարտեց այդ հաստատությունը, թե այստեղ էլ «օգնեց» ամենակարող հայրիկը, ի՞նչ տպավորություն կթողներ այդ բոլորը Փարիզի ու Պոլսի համազդիների վրա, — այդպիսի անհամար հարցեր իրեն շտվեց Առաքել Տատյանը: Նա 1848 թ. րուկըզբներին, այսինքն հեղափոխությունից բառացիորեն մի քանի օր առաջ որդուն փախցրեց Փարիզից և աներկմտորեն հասկացրեց նրա մոտ հաճախակի հավաքվող ծանոթ-ընկերներին, որ ամեն ինչ արդեն ավարտված է:

Այդ նույն պատճառաբանությամբ էլ՝ Ոսկանյանին դեմ էին տրամադրվել նրա ազգականները՝ Նուպարյանները: Հանրահայտ այս մեծահարուստները, որոնք Փարիզում է՛լ ավելի էին ընդարձակել իրենց գործարար կապերն ու Ֆրանսիայի հասարակական-սլետական այլևայլ անձանց հետ ունեցած իրենց ծանոթությունները, հասկանալի է, որ Ոսկանյանի պես «խռովարարին» պետք է հնարավորին չափ շուտ հասկացնեին, որ նա շատ էլ հաճելի մարդ չէ իրենց համար: Այս առիթով էր, ահա, որ Ոսկանյանը պետք է որոշակիորեն բացաղատվեր նրանցից և հրապարակավ ազդարարեր իր հավատամբը. «Միտքով տարբեր էինք, բնակությունով հեռու կապրեինք, անոնք կբարձրանային, մինչև փաշաներու աստիճան կելնեին, մենք կիջնեինք մինչև ուսմիկներու կարգը, ուր տեսանք, օր մը, ազատության սիրաբույր դեմքը, որ մեր կյանքին երազն էր մանկութենեն ի վեր»¹⁵: Տատյանների ու Նուպարյանների հետ այս խզումը վերջնական եղավ:

Ոսկանյանին գնահատող և նրան ճիշտ հասկացող մեր նշանավոր դեմքերից միայն մեկին դիտենք. դա Հովսեփ Շիշմանյանն էր, հանրահայտ Մերենցը: Վերջինս Փարիզ էր եկել 1848 թ. փետրվարի կեսերին, անձամբ ականատես էր եղել փետրվարյան և նրան հաջորդող իրադարձություններին և որ կարևորն է՝ կարողացել էր ճշտորեն հասկանալ և արժեքավորել տեղի ունեցած իրադարձությունների պատմա-քաղաքական իմաստը: Ճիշտ է, նա Ոսկանյանի նման զենք կամ դրոշ չվերցրեց, բայց այս ժամանակաշրջանում ճիշտ դրվատանքով արտահայտվեց տեղի ունեցածի մասին: Գաղափարական այս ընդհանրությունն էր, ահա, որը պետք է մերձեցնեի մեր երկու գործիչներին, որը մի որոշ ժամանակ վերածվեց բավականին սերտ համագործակցության:

Ցավոք՝ միայն այսքան: Փարիզի հայազգիներից հազիվ մեկ-երկուսին էլ կարելի կլինի ցույց տալ, որոնք համակրանք դրսևորեցին Ոսկանյանի վարքագծի նկատմամբ: Իսկ նրանց գերակշիռ մասը, և դրանում շուտով համոզվեց նաև Ոսկանյանը, դիրքավորվել էին նրան ընդդեմ:

15 Նույն տեղում, № 5, էջ 34:

Ավելի լավ չէր դրությունը ուսումնառության բնագավառում: 1849 թ. հավանորեն կեսերին, այսինքն շուրջ երեք տարվա վերապատրաստում անցնելուց հետո, Ոսկանյանն ավարտեց «Սենտ-Բարպը»: Այժմ նա ավարտական վկայական ուներ, որը նրան իրավունք էր վերապահում ընդունվել Համալսարանի բժշկական ֆակուլտետը, որը և, ի վերջո, նախընտրել էր: Սակայն «Սենտ-Բարպը» ավարտելուն պես, վարժարանի նոր տեսուչը (Ալեքսանդր Հաբրուստր ավելի բարձր պաշտոնի անցնելու կապակցությամբ ազատվել էր այդ պարտականությունից), ըստ երևույթին նաև Ոսկանյանի համար անսպասելի կերպով, ազատեց նրան նաև վերահսկիչի պարտականություններից: Դեր խաղաց դիվանագիտությունը՝ Ֆրանսիայի հնամենի ու պատկառազոր այդ վարժարանն ազատելու («Սենտ-Բարպը» հիմնադրվել է 1460 թվականին) և աշակերտությանը հեռու պահելու համար քաղաքականապես վտանգավոր մեկից, թե՛ այդպես էր կարգը, չդիտենք. հավանորեն ճիշտ է առաջին կռահումը: Իսկ «Սենտ-Բարպը» այդպես լրիվ ազատվելը ֆինանսական ծանր վիճակի մեջ դրեց Ոսկանյանին: Նրա միակ հույսը մնացին քաղաքի մեկերկու տներում ունեցած ֆրանսերեն դասերը, և խիստ բարդացավ բժշկական ֆակուլտետ ընդունվելու նրա գործը, որովհետև նախօրոք (և ապա պարբերաբար) պետք էր մեծ գումար մուծել: Ներքին դառնությամբ լի տողերով այս փաստը արձանագրում է նաև «Արշալույս Արարատյանը»: Նշելով Փարիզում գտնվող այն հայազգիներին, որոնք «անբարենպաստիկ» վիճակի մեջ են, շաբաթաթերթը հավելում է. «Օրինակի համար զմյուռնիացի Ոսկանյան պարոն Հայկ Ստեփանը (սկզբում, և մանավանդ մտերիմների շրջանում Ոսկանյանին կոչում էին Հայկ Ստեփան ձևով—Ս. Շ.) հիշատակված չէ, որ քաղաքիս սուրբ Մեսրոպյան դպրոցին վաղեմի աշակերտներեն է և երեքշորս տարի «Սենտ-Բարպի» դպրոցը դանազան ուսմանց խիստ հաջողությամբ հետևելեն ետև, այժմ դժբախտությամբ ստիպյալ է մասնավոր դասատվությամբ իր ավուր պարենը հոգալ հիշյալ մայրաքաղաքին մեջ: Այս քաջ հայկաբան և մաթեմատիկայի ու գաղղիականի լեզվին մեջ առաջադեմ եռանդուն երիտասարդը չկրցավ մինչև ցայսօր ազգասեր բարերար մը գտնել, որ օգնե իրեն, որպեսզի կարող ըլլա բժշկականության հետևիլ. թեպետև կիսոստանա, այս պատվական արհեստը սովրելեն ետև, հատուցանել իր բարերարին, իրեն փոխ տված դրամը»¹⁶:

Այս տողերը, որոնք անկասկած գրվել են Ոսկանյանի գիտությամբ, բարեբախտաբար, չմնացին անարձագանք: Բարերարները գտնվեցին, և Ոսկանյանը շուտով սկսեց հաճախել համալսարանի բժշկական ֆակուլտետը, որտեղ և սովորեց շուրջ երկու տարի, գուցե և՛ ավելի պակաս: Գիտելիքների այդ քանակն, իհարկե, նրան հնարավորություն չտվեց դառնալ մասնագետ-բժիշկ, ինչպես, ասենք, Մերենցը, բայց նրան հնարավորություն տվեց կողմնորոշվելու բժշկության տեսության հետ առնչվող մեկից ավելի հանգուցային հարցերում. մի բան, որի մասին վկայում է հենց ինքը: «Ես ժամանակավ,—գրում էր Ոսկանյանը,— քիչ մը բուժական արհեստին հետևեր եմ մարդուն կազմը հասկնալու, քան թե մարմինը դարմանելու համար»¹⁷:

¹⁶ «Արշալույս Արարատյան», 1850, № 378:

¹⁷ «Արևմուտք», 1859, № 7, էջ 52:

«Մարդուն կազմը հասկնալու» սահմաններում գիտելիքներ ունենալն, իհարկե, վերջնական նպատակ չէր կարող Ոսկանյանի համար, իսկ ուսումը շարունակելը Համալսարանում, որը հնուց հայտնի էր իր պահպանողական բնույթով և որտեղից, նույնիսկ 1860-ական թթ. հեռացնում էին ակադեմիկոս պրոֆեսորներին միայն այն բանի համար, որ նրանք համակրանքով էին արտահայտվել 1848 թ. ֆրանսիական հեղափոխության մասին, ավելի ու ավելի դժվար էր դառնում։ Միակ հույսը մնում էր Սորբոնը, որը թե՛ անհամեմատ ավելի դեմոկրատական բնույթ ուներ, և թե՛ շատ փոքր վարձ էր վերցնում սովորողներից։ Այստեղ էլ շարունակեց իր ուսումը Ոսկանյանը (հավանորեն՝ բժշկական ֆակուլտետում սովորելու հետ միաժամանակ) և այստեղ էր, որ նա աշակերտեց Ժյուլ Սիմոնին և Վիկտոր Կուզենին։ Ժյուլ Սիմոնը, որը Սորբոնի հասարակագիտական ֆակուլտետն էր հրավիրվել փիլիսոփայություն դասավանդելու համար և Վիկտոր Կուզենը, որը նույն հասարակագիտական ֆակուլտետում դասական շրջանի փիլիսոփայություն էր ավանդում, օգնում են մեզ ճշտելու, թե Սորբոնի որ ֆակուլտետում էր, որ իր բարձրագույն ուսումը ստացավ Ոսկանյանը։ Իսկ ուսանելը և մանավանդ՝ հնարավորության սահմաններում արագ ավարտելը շատ անհրաժեշտ էր, որովհետև Ֆրանսիայում զարգացող քաղաքական դեպքերը ոչ մի բարի բան չէին գուշակում Ոսկանյանի համար։

Ամեն ինչ սկսվեց այն բանից հետո, երբ միջակ խելքի, միջակ կարողությունների, ռազմական ու կազմակերպչական շատ համեստ ունակությունների տեր Լուի Նապոլեոնը, «իր զգվելիորեն գռեհիկ դեմքը մահացած Նապոլեոնի դիմակով քողարկվող այդ ավանտյուրիստը»¹⁸, անձնավորություն, որի քաղաքական կապիտալը միայն այն էր, որ կրում էր Բոնապարտ ազգանունը, 1851 թ. կարողացավ պետական հեղաշրջում կատարել և իրեն հայտարարել Ֆրանսիայի պրեզիդենտ։ Ծայր առան և հետևողականորեն իրագործվեցին այնպիսի խստություններ, որոնք աննախադեպ էին Ֆրանսիայի պատմության մեջ։ Նախ՝ պրեզիդենտ դառնալու հենց առաջին օրը, ղեկավարների 2-ին, արգելվեցին «Նասիոնալ» և «Ռեֆորմ» թերթերը, այն պատճառաբանությամբ, որ նրանք ժողովրդին գրգռում են պետության ու թագավորի դեմ. պատճառաբանություն, որը մի անգամ ևս վկայում է, թե 1840-ական թթ. դեպքերի ժամանակ քաղաքական ինչպիսի կողմնորոշում ունեին այդ երկու պարբերականները։ Այնուհետև տեղի ունեցավ Օրենսդիր ժողովի ցրումը և դեպուտատների մի մասի ձերբակալությունը։ Դրան հաջորդեց պարբերական մամուլն ու հրատարակությունները պրեզիդենտի լիակատար ու միանձնյա տնօրինության ներքո դնելու մասին օրենքի ընդունումը։ Դրան էլ հաջորդեց բարձրագույն ուսումնական հաստատություններից հանրապետական հայացքներ ունեցող պրոֆեսոր-դասախոսների մասսայական արտաքսումը (այդ պատրվակով էլ հեռացվեցին Ժյուլ Սիմոնն ու Վիկտոր Կուզենը, քիչ ավելի ուշ՝ Ժյուլ Միշլենն, էդգար Կինյենն ու Ադամ Միցկևիչը)։ 1852 թ. պրեզիդենտը նշանավորեց սոցիալիզմի բոլոր՝ քիչ թե շատ ականավոր ներկայացուցիչներին երկրից արտաքսելու մասին դեկրետի հրապարակումով։ Այնուհետև ծայր առավ

¹⁸ К. Маркс, Восемнадцатое Брюмера Луи Бонапарта, К. Маркс и Ф. Энгельс, Соч., т. 8, М., 1957, стр. 121.

1848 թ. դեպքերին մասնակցած անձանց նկատմամբ զանազան խստություններ ու կալանք կիրառելու լայն շարժումը և այլն:

Իր բնական խորաթափանցությամբ Ոսկանյանն զգաց, որ այս ամենը ոչ մի լավ բանով չի կարող վերջանալ իր համար: Եվ երբ տապալվեցին ազատագրվելու վերջին հույսերն էլ, այսինքն երբ պրեզիդենտ Լուի Նապոլեոնը ոչ միայն կարողացավ ձեռնել իր դեմ կազմակերպված 1851 թ. դեկտեմբերի 3—4-ի, 1852 թ. կեսերի ապստամբությունները, այլև 1852 թ. դեկտեմբերի 2-ին Նապոլեոն III անվամբ հռչակվեց Ֆրանսիայի թագավոր, Ոսկանյանի համար վերջնականապես պարզ դարձավ, որ այսուհետև էլ ավելի մեծ շափերով կշարունակվեն խստությունները և որ հերթը, ի վերջո, կհասնի նաև իրեն:

Նապոլեոն III-ի Ֆրանսիայի թագավոր ընտրվելուց մի քանի օր անաչ Ոսկանյանը ավարտեց Սորբոնի հասարակագիտական ֆակուլտետը, ստանալով «գիտության և դպրության պսակավորի աստիճան» և անհապաղ հեռացավ Փարիզից դեպի հայրենի եզերքները:

ПАРИЖСКИЙ ЭТАП ЖИЗНИ И ДЕЯТЕЛЬНОСТИ Ст. ВОСКАНЯНА

С. А. ШТИКЯН

(Резюме)

Одно из «белых пятен» в биографии известного армянского публициста Степана Восканяна (1825—1901) — это его шестигодичная деятельность (1846—1852) в Париже.

Осенью 1846 г., приехав в Париж, Восканян начинает сотрудничать в парижских газетах демократического направления «Националь» и «Реформ». В этот период и оформляется Восканян-публицист. Во время февральской революции 1848 г. в первых рядах восставших был и Восканян, который с оружием в руках участвовал во взятии королевского дворца Тюильри. Через год, в июне 1849 г., в Париже опять вспыхивает восстание, и снова в рядах восставших Восканян. На сей раз он подвергается двухмесячному аресту. После освобождения, в период жестокой реакции, когда новый король Франции Наполеон III чинил расправу над теми, кто проявлял хоть малейшую симпатию к идеям и событиям 1840-х годов, Восканян покидает пределы Франции.